

1985 nienz 6 nyied, banhaet, bouxsoengqsaenq hai gyaq danci beq aen daehfanzbu dauj daengz bak mbanj cam naeuz: “Moz Lijginz youq ranz lwi?”

Boux mehsimj ndeu han naeuz: “De ok rog dajgoeng lo, daxmeh de youq ranz.” Seizneix, boux mehmbwk cungnienz ndeu byaij gvaqdaeuj, de couh dwg daxmeh gou. Daxmeh gou daj ndaw fwngz bouxsoengqsaenq dawz gij doxgaiq gou dauq.

Ndwenlab ngeihsam, gou ma ranz, daxmeh gou gig vuenheij, lau gou dungxiek, gipmuengz cawj faenj hawj gou gwn. Deq gou gwn imq lo, de haeuj ndaw rug dawz dab baengznong okdaeuj cuengq youq gwnz daizcaet, baez caengz baez caengz haiok. Yenzlaiz ndaw baengz dwg mbaw bauqcej, gou miz di geizheih. Daxmeh doiq gou naeuz: “Neix dwg mbaw bauqcej geiq hawj mwngz, gou lau de deng duzsap roxnaeuz duznou haeb bae, ndigah aeu baengz duk hwnjdaeuj ce hawj mwngz.”

Neix dwg mbaw 《Bauq Sawcuengh》1985 nienz 9 nyied 14 hauh ngoenzhaenx okbanj. Song fwngz gou dawz mbaw bauq neix, bienj daengz banj daihngaih, gwnz de fatbiuj sawcuenh dinj gou, daezmoeg heuhguh 《Dauq Yamq Haeuj Hangzmou》! Yawj bien sawcuenh neix ndawsim gou geijlai doxndiep geijlai ndeigyaez ha! Lumjbaenz doiq gou naeuz, cijaeu buekguh haengjdingh baenz!

Henz ndang daxmeh riunyumnyum yawj gou, ndaw lwgda cungmuenx maqmuengh. “Ngoenzhaenx”, daxmeh naeuz, “Bouxsoengqsaenq ndenq mbaw bauqcej hawj gou, doiq gou naeuz: ‘Daeglwg mwngz youq gwnz bauqcej fatbiuj bien faenzcieng ndeu, ndaej cienzsijgauj bet maenz haj gak, mbaw fei cienzsijgauj neix dawz bae dadui goepyaenq le couh daengz youzdensoj bae lingx cienz.’ Vunz

Bet Maenz Haj Gak

8 块 5 角

□ Moz Lijginz / 磨礼勤

ndaw mbanj rox le cungj goenghoh gou, dawz mbaw bauqcej neix cienzyawj, bouxboux cungj yawj mbouj rox, miz boux lauxsae naeuz lumj dwg Yinghyij. Gou naeuz: ‘Neix dwg Sawcuengh, gij saw Bouxcuengh raeuz, daeglwg gou gaenq hag buenq bi lo.’ Auliengz naeuz: ‘Miz gihvei gou hix hag, hag rox le aeu dauj geiq fwen.’ Go’ gvei naeuz: ‘Sawcuengh gaenq yaenq hwnj gwnz ngaenzcej, baihgwnz yaek aeu doigvangq hagsib Sawcuengh.’ Gou naeuz: ‘Bouxcuengh raeuz gaxgonq rox gangj mbouj rox sij, lumjbaenz noix maz, seizneix ndei lo, dauqdae miz saw swheij lo.’ Ngoenz daihngaih, gou bae dadui goepyaenq le daengz youzdensoj lingx ndaej bet maenz haj gak ngaenz, dawz song maenz haj gak bae cawx ndaej haujlai doxgaiq.” Daxmeh gangj ndaej gig mizyinx.

Gij ngaenz neix doiq daxmeh dauj gangj, ndaej cawx haujlai doxgaiq, hoeng doiq gou youh dwg gij yiyi wnq, neix dwg gujli gou laebdaeb sij faenzcieng, neix cijdwg fanh leix cangzcwngh ngamq byaij yamq daih’ it, lij aeu engqgya roengzrengz. Daj seizhaenx hwnj, gou couh amq roengz gietsim: Doeklaeng aeu Sawcuengh sij ok engq lai cozbij!

Danhseih, seizhaenx gou mbouj ndaej ansim laebdaeb sij roengzbae. Daegnuengx gou doeg gauhcungh,

daxboh gou dwg vunzguhnaz, daxmeh gou dang duicangj ndaw mbanj, gou ngamq aeu yah, daengx ranz cij miz naz haj moux, gvaqcieng le gou couh youh okbae ra cienz lo.

Daj cien buen vax, beuj naez vat gvangq…… Daj bouxdajgoeng daengz dang lauxbanj, youh daj dang lauxbanj daengz bouxdajgoeng. Seiqvunz gou couh lumj raemxlangh, vaeg hwnj vaeg roengz. Guh seng’eiq siedbonj, ra hong guh youh deng vunz yaeuh cienz, mehyah ndatheiq yaek deuz. Gwnzbiengz haujlai saeh rwix gou cungj deng. Gou nyapnyuk simndum, gou saetmuengh simliengz! Baihnaj mokfoenfoen, gou yawj mbouj daengz seiz ndei……

Baez siengj daengz Sawcuengh, gou youh miz rengz lo. Gou daj seiziq couh ndiepgyaez sij faenzcieng, yawj gvaq haujlai saw, 18 bi seiz youq 《Majsanh Vwnzyi》caeuq 《Vujmingz Vwnzyi》fatbiuj sei caeuq fwen. 24 bi doiq Sawcuengh miz yinxdaeuz, couh bae riengz Vangz Gencangh lauxsae haghag singmeh、yinhmeh caeuq singhdiuh, gvaqlaeng couh gag hag buenq bi, couh sij baenz sawcuenh dinj 《Dauq Yamq Haeuj Hangzmou》.

Baez yaep da, 30 bi gvaqbae lo, yaek dawz hwnj bit aeu Sawcuengh sij faenzcieng moq. Hoeng, Sawcuengh gaenq lumz seuqsatsat. Cingj beixnuengx Moz Lijfungh bang ra swliu, de youq Majsanh Yen yinzminz

cwngfuj gunghcoz, bang ra ndaej song bonj sawloih, bonj ndeu naeng henj, bonj ndeu naeng heu, bienj bae bienj dauq cih ndeu cungj mbouj rox doeg, gou ienqhoij yaek dai, ra mbouj ndaej lauxsae son gou, song bonj sawloih lumjbaenz song goengq bya hungsang dangj youq baihnaj gou nei.

Mbouj ndaej vutvak! Bet maenz haj gak ngaenz youq ndawsim gou hemqswen! Gij ngaenz neix, daj gyaeuj daengz byai gaenq mbouj cij dwg ngaenz lo, de dwg aen ceijnamzcm ndeu, ceijyinx gou buet baenaj coh aeu Sawcuengh sij faenzcieng. Cijaeu lij miz gaemz heiq ndeu, gou couh caiq hix mbouj cuengq roengz de lo! Cungj dwg siengj hwnj bihaenx daxmeh lingx ndaej gij cienzsijgauj bae cawx huq dwg baenzneix angq, vunz ndawmbanj rox gou rox aeu Sawcuengh sij faenzcieng lij ndaej fatbiuj dwg baenzneix hozhaenz.

3 bi seizgan, gou daiq song bonj sawloih youq gwnz ndang, byaij daengz gak dieg bae dajgoeng, moix ngoenz banhaemh sai song aen cungdaeuz bae maeq, cungjsuenq ndaejgeiq hwnj di baenzlawz bae doeg lo, seizneix rox aeu Sawcuengh sij faenzcieng moq lo.

Bet maenz haj gak, youq ndawsim gou, couh lumj daengngoenz nei hoengzfwgfwg、ronghsagsag, hawj daengx ndang gou raeujrubrub!

Nywjva’nding

红花草

□ Vangz Fungmingz / 黄凤明

Diegseng gou miz cungj nywj ndeu, heuhguh nywjva’nding. Go rum neix maj ndaej gig maenh’ak, youq ndaw naz dieg baihnanz dou, dauqcauw cungj yawjraen rizdin de.

Seizdoeng nitsisi、gaekriengrieng, doenghgo caeuq gofaex haujlai gaenq ndoqndangndang lo, go nywjva’nding lij dangjfwndangj–rumz dwk maj gij goek youq laj namh!

Seizcin ngamq daengz, ndaw naz mbouj miz saek di saekloeg, go nywjva’nding ngwn dwk ciengj gonq lau laeng daj ndaw goekfiengz bi’ gvaq maj okdaeuj. Mbaw de heuswdswd、mwncupcup, gwnz ganj oi q hai miz duj va nding iq, lumj gingz bog feiz ndeu nei, ndeiyawj dangqmaz.

Ndwengeih, bak va caez hai, go nywjva’nding youh fouzeiq caeuq gyoengq va wnq doxceng, va de iq, couh ndoj youq ndaw mbaw mwn.

Laengcin gyoengqva loenqfoenfoen, va go nywjva’nding ngwn dwk ndwn youq gwnz ganj, seizneix va de cij rangfwdfwd, heiqhom gyuemluemz gwnzbiengz, hoengheiq lumj iemq haeuj dangzsei nei, yinx ndaej gyoengq rwi daengx ngoenz geuj heuz henz aeu vafaeux.

Moix daengz seiz ndaemnaz, go nywjva’nding youh deng fan haeuj ndaw namh bae, bienqbaenz bwnhfoed ndei, vih seizcou ndaej demsou vut mingh swheij.

Gyoengqvunz cungj naeuz haeux mbanj gou gwn ndaej van, cawj cuk mbouj coq dangzhau lwgnyez hix gyaez gwn. Gou nyinhnaeuz goulau aenvih vunz mbanj gou aeu go nywjva’nding guh bwnhfoed ba!



Goengq bya hung heuswd.